

# La pbd guarda cun optimissem vers l'onn d'elecziun

■ (anr/bt) A chaschun dal puschegn da Bumaun han ils exponents da la pbd dal Grischun fatg revista da l'onn passà ed annunzià ch'els guardian cun optimissem vers l'onn da tschernas e che lur partida saja pronta da prestar sia part en favur dal chantun e da la populaziun en las regiuns. La sava da l'onn ans porscha la chaschun da far revista dal passà e ristgar ina revista sin il nov. Quai han era fatg ils exponents da la Partida burgais-democratica (pbd) a chaschun da l'apero d'onn nov. *Benno Niggli*, il parsura da la pbd, ha menziunà che l'onn passà saja stà in decisiv per sia partida. Ma malgrà ch'i na saja betg reussì da defender il post guvernativ da *Barbara Janom Steiner* guardia la pbd cun optimissem en l'onn nov. «Cun las elecziuns dal cussegl naziunal stain nus avant in ulteriur impurtant onn da tschernas», di Niggli ed el funda sias aspectativas positivas sin il fatg ch'i saja reussì a la pbd da mantegnair il post en la regenza cun *Jon Domenic Parolini*, da regiuvinar sia fracziun en il cussegl grond e la pbd disponia cun *Duri Campell* d'in ferm representant en il cussegl naziunal che stettia a disposiziun per la proxima perioda d'uffizi.

Niggli è sa mussà satisfatg che la pbd è cun 23 deputads la terz gronda fracziun en il ravugl dal cussegl grond ed oravant tut che la mesadad da quella consista da forzas giuvinas. Betg mancà ha era sia renconuschientscha per las prestaziuns da *Barbara Janom Steiner*, accentuond

ch'ella relaschia in chantun cun finanzas intactas.

## Visitar las regiuns ed augmentar la solidaritad

Jon Domenic Parolini, da nov minister da la cultura e president da la regenza, ha beneventà ils preschents cun in fervent «Bun di, bun onn!» El saja intenziunà da visitar tuttas regiuns dal chantun durant ses onn presidial, oravant tut vegnia el a visitar las scolas sin tut ils stgalims. Plinavant veglia el svegliar la chapientscha vicendaivla tranter las regiuns. «Sch'ins ha chapientscha l'in l'auter èn ins era pront d'acceptar mesiras d'egualisaziun tranter las regiuns», di Parolini che s'engascha en favur dal populament decentral. Da promover la sensibilidà vicendaivla e d'acceptar ils giavischs da tschel augmentian la solidaritad entaifer il chantun.

## Activs sin plaun chantunal e naziunal

Il parsura da la fracziun, *Gian Michael* da Donat, è medemamain s'allegrà da la fracziun regiuvinada che saja ina squadra fitg motivada ed activa. Da las indesch incumbensas, ch'il cussegl grond ha decidì durant la davosa sessiun, derivian tschintg da la pbd. «Quellas incumbensas han in vast spectrum: Ellas pertutgan la periferia, l'economia en las regiuns e ses abitants», accentuescha Michael.

Il cusseglier naziunal en uffizi *Duri Campell* ha dà divers sguards sin la politica naziunala, aschuntond ch'il parla-



Ils exponents da la pbd guardan cun optimissem en l'avegnir: Cussegljer naziunal *Duri Campell*, *Gian Michael*, parsura da fracziun, *Benno Niggli*, parsura pbd, e cusseglier guvernativ *Jon Domenic Parolini*.

FOTO D. CAMENISCH

ment federal haja savens tema da prender decisiuns che portan en l'avegnir. Uschia na possia el betg sustegnair il «pachet faus» areguard la refurma da taglia cumbinada cun l'AVS. El è era sa pronunzià cleramain cunter l'export d'armas en ter-

ras cun guerras civilas ed ha crititgà la lescha davart il CO<sub>2</sub> sco insufficienta perquai ch'ella desista d'ina taxa sin cherosin e na promova betg l'electromobilitad.

Evident che Niggli è sa mussa da bun curaschi per las tschernas naziunales da

quest onn sunter il pled cumpetent da *Campell*. «Nus essan motivads e da buna speranza che nus vegnian a defender noss post en il cussegl naziunal cun success grazia a *Duri Campell* e d'ina glista da fermas personalitads», concluda Niggli.